



El Curtgin d'honor dalla Ligia Grischa a Trun undrescha la Surselva Romontscha igl onn proxim sis ulteriuras personalitads ch'ein sefatgas meriteivlas per la cultura romontscha.

FOTO ANDREAS CADONAU

Tschun novs ed ina nova el curtgin

La Surselva Romontscha ha tsherniu sis personalitads ord igl intschesch dalla anteriura Ligia Grischa ch'ein sefatgas meriteivlas sin differents camps per la cultura romontscha. Igl onn proxim, a caschun dallas festivtads da 600 onns Ligia Grischa, survegnan ils undrai ina inscripziun el Curtgin d'honor dalla Ligia Grischa a Trun.

ANDREAS CADONAU/FMR

Egl aschinum nau «Curtgin d'honor dalla Ligia Grischa» a Trun ein differents personalitads ch'ein sefatgas meriteivlas per la cultura romontscha undradas. Quei curtgin ei fermein colligiaus cun las festivtads dedicadas alla fundaziun dalla Ligia Grischa digl onn 2024. Il curtgin ei vegnius instradaus avon 100 onns e retscheiva er in plaz ellas festivtads 600 onns Ligia Grischa digl onn proxim che statan sut l'enzenna «Sut igl Ischi 2024». Sco quei ch'il president dalla Surselva Romontscha, *Toni Vinzens* declara, ha la suprastanza dalla Surselva Romontscha tsherniu sis personalitads romontschas ord igl intschesch dalla anteriura Ligia Grischa che vegnan honoradas cun ina inscripziun sin ina tabla per lur merets a favur dalla cultura romontscha.

Elegiu sis personalitads

Undrai cun ina tabla commemorativa el Curtgin d'honor dalla Ligia Grischa a Trun igl onn 2024 vegnan ils scribents Flurin Darms (1918–2009) e Vic Hendry (1920–2014), ils cumpo-nists Gion Antoni Derungs (1935–2012) e Benedetg Dolf (1918–1985), l'artista Toja Isenring (1919–2014) ed igl artist da Trun Matias Spescha (1925–2008). Sco quei ch'il parsura dalla Surselva Romontscha explichescha, ha l'uniun romontscha sursilvana contactau pliras personas activas ella veta e cultura romontscha per schar proponer personas pil curtgin d'honor. «Sin fundament dallas propostas ha la su-

«Demai che las dunnas han retschiert pér igl onn 1971 il dretg da vuschar en Svizra fai era buca surstar ch'ellas ein meins presentas ellas annalas dalla Romontschia.»


Martin Cabalzar, anteriur cauredatur dalla gasetta LQ

prastanza dalla Surselva Romontscha fatg la tsharna.» Toni Vinzens fa attent al regulativ che pretenda in temps da spetga da diesch onns dapi la mort per che las personas sappien vegnir undradas el curtgin d'honor. Ed el ha era concediu che buc ual bia dunnas hagian anflau la via ellas propostas inoltradas alla suprastanza dalla Surselva Romontscha. Ils 15 da settember 2024 succeda l'undrientscha publica che regorda allas activitads dallas personas ch'anflan da niev menziun a Trun sut igl ischi. La fiastetta el curtgin d'honor arrundescha las fe-


stivitads pervidas durant la stad a caschun dil giubileum da 600 onns Ligia Grischa.

Extendiu igl intschesch

Igl anteriur cauredatur dalla gasetta LQ, *Martin Cabalzar*, lai repassar en ina contribuziun che cumpara el proxim Calender Romontscha la historia dil Curtgin d'honor dalla Ligia Grischa. Entochen ussa regorda quei liug a 31 personalitads ch'ein per part aunc beinencon-schentas ella Romontschia. Il num uffical «Curtgin d'honor dalla Ligia Grischa» ha il curtgin retschiert igl onn 1924 ed ils emprems quater honorai, Pader Placi a Spescha, Giacun Hasper Muoth, Casper Decurtins ed Alfons Tuor han aunc retschiert mintgin ina tabla singula da renconuschientscha. All'entschatta era il curtgin d'honor aunc reservaus agl intschesch romontsch catolic dalla Romania. Igl onn 1971 ein Romania e Renania secunvegnidas da slargar igl intschesch per far la tsharna dils meriteivels Romontschs. La davosa inscripziun ei succedia igl onn 2002. Martin Cabalzar menziuna che sulet ina dunna (Anna Capadrutt), naven da l'auter onn duas dunnas, seigien menziunadas e honoradas el curtgin d'honor. In fatg che resplendi buca la valur dalla dunna per la cultura romontscha, sco quei che Martin Cabalzar scriva en sia contribuziun. «Demai che las dunnas han retschiert pér igl onn 1971 il dretg da vuschar en Svizra fai era buca surstar ch'ellas ein meins presentas ellas annalas dalla Romontschia.» In fatg che semida e ch'ei gia semidaus els decennis vargai.



Treis dils honorai che survegnan in'inscripziun sut igl Ischi: Gion Antoni Derungs, Vic Hendry e Flurin Darms (da san.)...



... ed ils ulteriurs treis: Benedetg Dolf, Toja Isenring-Maissen e Matias Spescha (da san.).

FOTOS MAD/RTR/FMR